

ХДП

1918-yil
21-iyundan chiqa
boshlagan

№ 18, 2024-yil
1-may,
chorshanba (32.816)

O'zbekiston OVOZI

Ijtimoiy-siyosiy gazeta

Birgalikda ijtimoiy davlat sari!



ЯНГИЛАНГАН КОНСТИТУЦИЯ БИЛАН БИР ЙИЛ 2

ОПТИМИСТИК ВА ҲАЁТИЙ ТАКЛИФЛАР

**ЎЗБЕКИСТОН ХДП МАРКАЗИЙ
КЕНГАШИ РАИСИ УЛУҒБЕК ИНОЯТОВ
РЕСПУБЛИКАМИЗНИНГ БАРЧА
ҲУДУДЛАРИДАГИ ЁШЛАР БИЛАН
ОЧИҚ МУЛОҚОТ ЎТКАЗДИ**

Ўзбекистон Халқ демократик партияси Марказий Кенгашида Республика ёшлари онлайн форуми ўтказилди. Партиянинг "Ёшлар қаноти" фаоллари, Ёшлар парламенти аъзолари, депутатлар ҳамда жойлардан фаол йигит-қизлар иштирок этган форумни Ўзбекистон ХДП Марказий Кенгаши раиси Улуғбек Иноятов очиб берди.

Ўзбекистон Халқ демократик партиясининг ҳуқуқлар ва имкониятлар тенглиги, манзилли қўллаб-қувватлаш ҳамда фаолликни рағбатлантириш каби устувор ғоялари ёшлар манфаатларига ҳар томонлама мосдир.

3 САҲИФАДА



БОЛАЛАРДА КЎЗ САРАТОНИ: АЛОМАТЛАР ВА САБАБЛАР

7 САҲИФАДА

ТОВАР ВА ХИЗМАТ КУНДА ЗАРУР

Аҳоли фаровонлигини ўзида мужассам этадиган энг асосий кўрсаткичлардан бири – бу оила бюджетининг ҳажми ва таркибидир.

Ушбу кўрсаткич истеъмол бозорининг зарур товар ва ижтимоий хизматлар билан қанчалик тўлдирилгани ҳамда аҳолининг ундан фойдаланиш имкониятлари қай даражада эканлиги билан ўлчанади.

Озиқ-овқат хавфсизлигига, унинг арзон ва етарли эканлигига барқарор ривожланишнинг ажралмас қисми сифатида қаралмоқда.

Шу сабабдан Ўзбекистон Халқ демократик партияси 2019 йилги парламент ва маҳаллий Кенгашларга бўлиб ўтган сайловдан сўнг эҳтиёжманд аҳоли қатлами кундалик зарур товар ва хизматлар билан таъминланиши ғоясини илгари сурган эди.

5 САҲИФАДА



ЯНГИЛАНГАН КОНСТИТУЦИЯ БИЛАН БИР ЙИЛ

Ўтган йили Янги Ўзбекистонни бунёд этишда яна бир муҳим тарихий қадам ташланди. Конституциямиз янги тахрирда қабул қилинди. Ўзбекистон ўзини "ижтимоий давлат", деб эълон қилди. Давлат ўз фаолиятини инсон фаровонлигини ва жамиятнинг барқарор ривожланишини таъминлаш мақсадида қонунийлик, ижтимоий адолат ва бирдамлик тамойиллари асосида амалга ошириши белгиланди.



Кеча Олий Мажлис Қонунчилик палатасида илмий-амалий конференция бўлиб ўтди. Конференцияси Олий Мажлис Қонунчилик палатаси Спикери Нуриддин Исмоилов кириш сўзи билан очиб берди:

Ўтган йили бўлиб ўтган умум-халқ референдумида халқимиз ўзининг юксак сиёсий онги, ҳуқуқий маданияти ва дунёқарашини намоён этиб, янги тахрирдаги Конституцияни қабул қилди. Президентимиз конституциявий ислохотларнинг ҳам ташаббускори, ҳам илҳомлантирувчиси бўлди. Айтиш кераки, Бош қомусимиз миллий давлатчилик тараққиётининг ҳозирги босқичида жамият ва давлатни янада ривожлантиришнинг устувор йўналишларини белгилаб, Янги Ўзбекистоннинг стратегик мақсадларини рўёбга чиқаришнинг сиёсий-ҳуқуқий асосларини яратиб берди.

Ҳақиқатан ҳам, янги тахрирдаги Конституция билан Ўзбекистонда янги ижтимоий-сиёсий муҳит шаклланди, давлат ўзига улкан ижтимоий-иқтисодий мажбуриятларни олди. Мамлакат ўзини ижтимоий давлат сифатида эълон қилди, инсон ҳуқуқ ва эркинликларини ҳимоя қилишнинг мутлақо янги механизми жорий этилди. Яна бир эътиборга молик жиҳати, давлат ҳокимиятини ташкил этишнинг самарали янги модели яратилди.

Конституциямизда муайян меъёрий-ҳуқуқий ҳужжатлар қабул қилинганлигидан ёки қабул қилинмаганлигидан қатъи назар, Конституция қоидаларининг тўғридан

тўғри амал қилишини таъминлаш орқали демократия, инсон ҳуқуқлари ва эркинликларини таъминлаш механизмлари мустаҳкамланди.

Шунингдек, инсон ҳуқуқлари ва эркинликларига оид аниқ нормалар сони уч баробардан зиёд кўпайди. Фуқароларнинг шахсий ҳуқуқлари кенг кўламли масалаларни қамраб олган нормалар билан янада мустаҳкамланди. Атроф-муҳит билан боғлиқ ҳуқуқлар, соғлиқни сақлаш, гендер тенглиги, Интернетдан фойдаланиш, шахсий маълумотларни ҳимоя қилиш, оммавий ахборот воситалари эркинлиги, Фуқаролик жамияти институтларини ривожлантириш, давлат хизматларидан фойдаланишдаги тенглик, банк операциялари ва ҳисобварақларининг махфийлиги Конституция даражасида мустаҳкамланди.

Фуқаролар қонун лойиҳасини тўғридан тўғри парламентга кириштириш ҳуқуқига эга бўлди. Ушбу янги ташаббус фуқароларнинг ўз ҳаётига, умуман, жамиятга ва давлатга таъсир этувчи қарорлар қабул қилишдаги иштирокини оширишга қаратилган. Хусусий мулк ҳуқуқи, товарлар, хизматлар, меҳнат ресурслари ва капитал ҳаракати эркинлигининг кафолатлари мустаҳкамланди.

Ўз навбатида, давлатнинг ижтимоий соҳадаги мажбуриятлари билан боғлиқ бўлган қоидалар сони уч баробар кўпайди.

Давлат томонидан болалар меҳнатининг ҳар қандай кўринишига барҳам бериш, меҳнат бозорига аёлларга нисбатан камситишларнинг, ишсизликнинг олдини олиш

Мамлакат ўзини ижтимоий давлат сифатида эълон қилди, инсон ҳуқуқ ва эркинликларини ҳимоя қилишнинг мутлақо янги механизмлари жорий этилди. Яна бир эътиборга молик жиҳати, давлат ҳокимиятини ташкил этишнинг самарали янги модели яратилди.

чоралари кўрилиши, узлуксиз таълим тизими конституциявий жиҳатдан кафолатланди.

Конференцияда қайд этилишича, Олий Мажлис палаталари томонидан 38 та банддан иборат Конституция моҳиятини тушунтириш бўйича комплекс дастур қабул қилинди. "Янги Ўзбекистон Конституцияси" ягона миллий портали "konstitutsiya.gov.uz" ва унинг мобил иловаси ишга туширилди.

Ҳозир парламент, суд ва ижро ҳокимияти, жойларда ҳокимлар

ва халқ депутатлари Кенгашлари янги Конституциявий шароитда иш олиб бораётгани алоҳида таъкидланди. Умуман, барча давлат органлари Бош қомусимизнинг ҳар бир қоидадини тўлиқ, сифатли ва сўзсиз бажарилишига масъуллиги, натижадорлик эса бош мезон этиб белгилангани қайд этилди.

Олий Мажлис Сенатининг Бюджет ва иқтисодий ислохотлар масалалари қўмитаси раиси Эркин Гадовев ўз сўзида шундай деди:

Ўтган бир йил давомида биз жойларда ҳудудларнинг ижтимоий-иқтисодий ривожланиш масалаларини ўрганиб чиқдик. Андижон, Фарғона, Наманган, Сирдарё, Жиззах ҳамда Қашқадарё вилоятларида Сенатнинг сайёр йиғилишларини ўтказдик. Энг асосийси, маҳаллий Кенгашларга ёрдам бериш, уларнинг муаммоларини ечиш мақсадида Кенгаш йиғилишларига вазирлик ва идоралар вакилларини ҳам жалб қилдик. Муаммолар борми, уларнинг ечимини шу жойнинг ўзида кўриб чиқдик.

Албатта, бу борадаги ишларимиз давом этади. Энг асосийси, олдимизда катта вазифалар турибди. Биз амалдаги қонунларимизни Конституцияга мослаштиришимиз керак. Бу борада ишларимиз кўп, деб ўйлайман. Ҳудудларда ўтказилган учрашувларимизда кўп муаммолар масалалар борлиги аниқланмоқда.

Айниқса, Конституциямизда аниқ белгилаб берилганидек, Ўзбекистон ҳудуди ягона иқтисодий

макон. Демак, молиявий ресурслар, меҳнат ресурслари ҳамда товар-хизматларнинг ҳаракати ҳеч қандай чекловларсиз амалга оширилади.

Конференцияда Олий Мажлис Қонунчилик палатасидаги Халқ демократик партияси фракцияси раҳбари Улугбек Иноятов сўзга чиқди. Конституциявий ислохотларнинг ижтимоий йўналтирилганлиги аҳолининг, биринчи навбатда, ижтимоий ҳимояга муҳтож қатламнинг ҳуқуқ ва манфаатларини таъминлаш бўйича кафолатларни мустаҳкамлаганини алоҳида таъкидлади:

Янги тахрирда қабул қилинган Конституцияда сиёсий партияларнинг ҳолялари, ўз олдига қўйган вазифалари ҳуқуқий меъёр сифатида ўз аксини топди. Бизнинг партиямизнинг ҳам узоқ йиллардан бери илгари суриб келган ғояси, яъни ижтимоий давлат тамойили Бош қомусимизда аниқ белгилаб қўйилгани катта тарихий ютуқ бўлди. Албатта, биз ҳам ана шу имкониятдан фойдаланган ҳолда, Конституциямизда белгиланган фуқароларимизнинг ҳуқуқларини ижтимоий тенглик, адолат нуқтаи назаридан ҳимоя қилишни ўз олдимизга вазифа сифатида белгилаб олдик.

Бу йил олдимизда катта сиёсий жараён турибди. Ҳар бир сиёсий партия Сайловолди дастурини шакллантиради ва албатта, ундаги ғоя ҳамда мақсад-вазифалар янги тахрирдаги Конституциямизга ҳам оҳанг бўлиши керак.

Бизнинг партиямиз ҳам бу имкониятлардан фойдаланган ҳолда, бўлғуси сайловлар олдидан бунга алоҳида эътиборини қаратади. Бунинг учун биз маҳаллаларда юриб, халқимиз билан мулоқот қилиб, айнан қуйидан Конституциямизда белгилаб берилган ҳуқуқларни рўёбга чиқариш бўйича 2 муҳим масалада ўз вазифаларимизни белгилаб олдик.

Биринчидан, Сайловолди дастурда қонун ижодкорлиги орқали ушбу ҳуқуқларни амалга ошириш механизмидан фойдаланиш, иккинчидан, парламент назорати орқали конституцион ҳуқуқ ва меъёрларнинг амалда таъминланишини назорат қилишни мақсад қилишимиз.

Тадбирда Конституцияни изчил амалга ошириш бўйича устувор вазифалар атрофлича муҳокама қилинди. Унинг мазмунини ҳар бир давлат хизматчисининг кундалик фаолиятида, инсонлар ҳаётида аниқ акс этиши зарурлиги қайд этилди.

Лазиза ШЕРОВА, "Ўзбекистон овози" муҳбири.



ҲАР ОЙДА МОДДИЙ ЁРДАМ БЕРИЛАДИ

2023 йил 27 декабрдаги Президент қарорига мувофиқ, ўзгалар парваришига муҳтож ёлғиз яшовчи ҳамда ёлғиз кексалар ва ногиронлиги бўлган шахсларнинг реестрига киритилганларга ҳар ойлик уй-жой коммунал хизматлар ҳақини тўлаш бўйича компенсация тўланади.

Бундан ташқари, озиқ-овқат маҳсулотлари ва шахсий гигиена товарлари учун ҳар ойда қўшимча пул тўловлари ўрнига ёлғиз кексалар ва ногиронлиги бўлган шахслар учун ҳар ойда минимал истеъмол харажатлари миқдорига моддий ёрдам жорий этилади.

ФАҚАТ ҚОНУНДА БЕЛГИЛАНАДИ

Жорий йил 21 февралдаги Президент фармонида кўра, фуқаролар ва тадбиркорлик субъектлари учун янги мажбурий тўловлар ва йиғимларни фақатгина қонунда белгилаш амалиёти жорий этилади.

ЭЛЕКТРОН ШАКЛДА БЕРИЛАДИ

Президентнинг 3 январдаги фармонида кўра, суд ҳужжатлари асосида ижро ҳужжатларини электрон шаклда бериш (юбориш, тақдим этиш) тартиби жорий этилади;

фуқаролардан қарздорликлари учун ундирув қаратилиши мумкин бўлмаган энг кам кафолатланган даромад белгиланади; ижро ишини юритишнинг соддалаштирилган тартиби почта харажатлари бўйича қарздорликни ундиришга ҳам татбиқ этилади.

ҚОПЛАБ БЕРИЛАДИГАН МАБЛАҒЛАР ОШИРИЛАДИ

Давлатимиз раҳбарининг 27 февралдаги қарори билан протез мосламалари ва реабилитация воситалари хариди учун давлат томонидан муҳтож шахсларга қоплаб бериладиган маблағлар миқдорини бозор конъюнктурасидан келиб чиқиб, ўртача 3 бараваргача, айрим воситаларнинг турлари эса 10 бараваргача оширилади.

Энди ногиронлиги бўлган шахсларнинг протез мосламалари ва реабилитация воситаларига муҳтожлиги алоҳида тиббий хулосасисиз, яъни ногиронлик тўғрисидаги маълумотнома асосида белгиланади.

Шунингдек, ногиронлик гуруҳига эга бўлмаган пенсия ёшидаги шахсларнинг протез мосламалари ва реабилитация воситаларига муҳтожлиги тўғрисидаги тиббий хулоса «Тиббий-ижтимоий экспертиза» электрон ахборот тизимида расмийлаштирилади.

ИЖТимоий ХИЗМАТЛАРГА ТАДБИРКОРЛАР ЖАЛБ ЭТИЛАДИ

Вазирлар Маҳкамасининг 11 мартдаги қарорига асосан тажриба тариқасида Тошкент шаҳрининг Мирзо Улуғбек туманида ўзгалар парваришига муҳтож шахсларга ижтимоий хизматлар кўрсатиш жараёнига аутсорсинг асосида тадбиркорлик субъектлари жалб этилади.

ЯШИРИН ИҚТИСОДИЁТГА ҚАРШИ

Xushnubek.uz хабар беришича, ҳукумат томонидан яширин иқтисодиётга қарши курашиш бўйича чоралар ишлаб чиқилмоқда. Унга кўра, қуйидагилар тақлиф қилинапти:

- кўчмас мулк ва транспорт воситаларини сотишни фақат нақд пулсиз шаклда амалга ошириш ва ушбу операциялар бўйича комиссияни бекор қилиш;
- товар ва хизматларнинг умумий қиймати **3000 доллардан ошса, тўловларни фақат нақд пулсиз кўринишда амалга ошириш;**
- улгуржи савдони тўлиқ нақд пулсиз ҳисоб-китобларга ўтказиш;
- барча бюджет ташкилотлари ходимлари, ОТМлар, ҳарбий хизматчилар ҳамда йирик солиқ тўловчиларнинг **100 фоиз иш ҳақини банк карталарига ўтказиш** йўли билан тўлаш;
- фақат нақд пулсиз шаклда тўланадиган хизматлар каталогини тасдиқлаш;
- онлайн давлат хизматлари ва тўловлар, жисмоний шахслар ўртасидаги ўтказмалар, шахсий маблағларни бошқариш ва онлайн савдо хизматларини ўз ичига олувчи "WeChat" ва "Kaspi" каби тизимларга ўхшаш технологик ечим яратиш.

Бундан ташқари, 1 июлдан бошлаб чакана савдо, хизмат кўрсатиш ва умумий оқватланиш соҳаларида жисмоний шахслар томонидан тўловлар нақд пулда амалга оширилганда 1% миқдорда кешбек қайтариш тартибини бекор қилиш режалаштирилмоқда.





ОПТИМИСТИК ВА ҲАЁТИЙ ТАКЛИФЛАР

ЎЗБЕКИСТОН ХДП МАРКАЗИЙ КЕНГАШИ РАИСИ УЛУҒБЕК ИНОЯТОВ РЕСПУБЛИКАМИЗНИНГ БАРЧА ХУДУДЛАРИДАГИ ЁШЛАР БИЛАН ОЧИҚ МУЛОҚОТ ЎТКАЗДИ

ЎЗБЕКИСТОН ХАЛҚ ДЕМОКРАТИК ПАРТИЯСИ МАРКАЗИЙ КЕНГАШИДА РЕСПУБЛИКА ЁШЛАРИ ОНЛАЙН ФОРУМИ ЎТКАЗИЛДИ. ПАРТИЯНИНГ "ЁШЛАР ҚАНОТИ" ФАОЛЛАРИ, ЁШЛАР ПАРЛАМЕНТИ АЪЗОЛАРИ, ДЕПУТАТЛАР ҲАМДА ЖОЙЛАРДАН ФАОЛ ЙИГИТ-ҚИЗЛАР ИШТИРОК ЭТГАН ФОРУМНИ ЎЗБЕКИСТОН ХДП МАРКАЗИЙ КЕНГАШИ РАИСИ УЛУҒБЕК ИНОЯТОВ ОЧИБ БЕРДИ.

ЎЗБЕКИСТОН ХАЛҚ ДЕМОКРАТИК ПАРТИЯСИНИНГ ҲУҚУҚЛАР ВА ИМКОНИАТЛАР ТЕНГЛИГИ, МАНЗИЛЛИ ҚўЛАБ-ҚУВВАТЛАШ ҲАМДА ФАОЛЛИКНИ РАҒБАТЛАНТИРИШ КАБИ УСТУВОР ҒОЯЛАРИ ЁШЛАР МАНФААТЛАРИГА ҲАР ТОМОНЛАМА МОСДИР.

ШУ МАЪНОДА ПАРТИЯНИНГ ДАСТУР ВА ЛОЙИХАЛАРИНИ ТАКОМИЛЛАШТИРИШДА, ЯНГИ ТАШАБУСЛАРНИ ИЛГАРИ СУРИШДА, ИЖТИМОЙ МАСАЛАЛАРГА ЯНГИЧА ЕЧИМЛАР ТОПИШДА ЁШЛАРНИНГ ФИКР-МУЛОҲАЗАЛАРИ, ТАКЛИФЛАРИ ИНОБАТГА ОЛИНМОҒИ ТАБИЙ. ЁШЛАРНИНГ ҲУҚУҚ ВА МАНФААТЛАРИНИ ҲИМОЯ ҚИЛИШ, ҚўШИМЧА ИМКОНИАТЛАР ЯРАТИШ ҲАҚИДАГИ ЭНГ ЯХШИ ФИКРЛАР УЛАРНИНГ ЎЗИДАН ЧИҚАДИ, АЛБАТТА.

ОНЛАЙН ФОРУМДА 14 ТА ХУДУДИЙ СТУДИЯДАН УЛАНГАН ЙИГИТ-ҚИЗЛАР ЎЗ ТАКЛИФ ВА ТАШАБУСЛАРИНИ БИЛДИРИШДИ. СИЁСИЙ-ҲУҚУҚИЙ ЖАРАЁНЛАРДА ЁШЛАРНИНГ ФАОЛ ИШТИРОКИГА ЭРИШИШ, ҲАЁТГА ОЧИҚ ВА Тўғри МУНОСАБАТНИ ШАКЛЛАНТИРИШ КАБИ МАСАЛАЛАР Бўйича ФОРУМ ҚАТНАШЧИЛАРИ ТАҚДИМОТЛАР ҚИЛДИ.



СУРДО ЁКИ ТИФЛО ТАРЖИМОНЛАРИ ЕТИШМАЙДИ

Айдана АЛЛАМБЕРГЕНОВА,
Ўзбекистон ХДП Қорақалпоғистон Республика Кенгаши фаоли:

— Ешитиш ва нутқида муаммоси бўлган инсонларнинг давлат хизматларидан, жамоат транспортлардан мустақил фойдаланиши учун имкониятларни кенгайтириш лозим, деб ҳисоблаймиз.

Сабаби, давлат идораларида, аэропортларда, темир йўл вокзаллари ва автовокзалларда ушбу тоифадаги шахслар билан мулоқот қилувчи сурдо ёки тифло таржимонлари етишмайди. Шундан келиб чиқиб, давлат ташкилотлари ва жамоат транспортлари тизимида фаолият юритувчи ходимлардан бир нафарини "Ишга марҳамат" моно-марказларида ташкил этилган сурдо ва тифло таржимони ўқув курсларида ўқитиш йўлга қўйилса, айни мuddао бўларди.

Партия дастурида, шунингдек, олий таълим муассасаларида тахсил олаётган кўзи ожиз тенгдошларимизни Брайль алифбосидаги дарсликлар ва махсус дафтларлар билан таъминлаш, ёшлар ўртасида китобхонликни оmmалаштириш мақсадида жойларда "Маҳалла кутубхонаси"ни ташкил этиш ишларини жадаллаштириш ғояси ўрин олишини истардик.

ПЛАСТМАССА МАҲСУЛОТЛАРИНИ ҚОНУН БИЛАН ТАРТИБГА СОЛИШ КЕРАК

Диёрбек ҲУСЕИНОВ,
Навоий давлат педагогика институти талабаси:

— Мамлакатимизда маиший чиқиндиларни қайта ишлаш соҳасида қилиниши керак бўлган ишлар оз эмас. Бу йўналишда йирик қувватлар ҳам, саралаш полигонлари ҳам қурилиши мумкин. "Тоza худуд" ДУК томонидан барпо этилган полигонлар кўпинча санитар-эпидемиологик ва экологик талабларга жавоб бермайди.

Буларнинг барчаси битта жойда йиғилиб қолган ва сараланмаган чиқиндилар атроф-муҳитнинг ифлосланишига олиб келмоқда. Шунинг учун партия сайловолди дастурига "Чиқиндилар тўғрисида"ги қонунни такомиллаштириш ва уни янги тахрирда тайёрлаш вазифасини киритиш зарур.

БМТ ҳисоботида асосан микропластиклар биз истеъмол қиладиган оvқат, ичадиган сув ва нафас олаётган ҳавода мавжуд. Агар пластмассадан қайта фойдаланиш, қайта ишлаш, йўналишни ўзгартириш ва диверсификация қилиш имкониятига эга бўлinsa, 2040 йилга келиб пластик ифлосланиш 80 фоизга камайиши мумкин. Шу сабабли бир марта ишлатиладиган пластмассадан тайёрланган маҳсулотларни ишлаб чиқариш ва сотишни қонун билан тартибга солиш таклифини билдираимиз.



ИЖТИМОЙ ШАРТНОМАЛАР КЕРАК



Абдуллоҳ АҲМЕДОВ,
Анджон юридик техникуми ўқувчиси:

— Сайловолди дастурига аҳолини ижтимоий Ҳимоя қилишда давлатнинг ижтимоий мажбуриятларини ошириш ва ижтимоий келишув дастурларини жорий қилиш масаласини киритишни таклиф этамиз.

Ижтимоий келишувлар эҳтиёжманд аҳолига қўмаклашган ҳолда инсон капиталини ривожлантириш орқали келгуси авлод учун "ижтимоий лифт" вазифасини бажаради. Бундан ташқари, ижтимоий шартномалар камбағалликнинг гендер тафовутини яхшилашга ёрдам беради.

Бизнингча, эҳтиёжманд оила ёки фуқаро билан бандликни таъминлаш, касб-хунар ва хорижий тилларни ўрганиш ёки тадбиркорлик кўникмаларини шакллантириш, ижтимоий ёрдам ва хизматлар кўрсатиш каби йўналишларда ижтимоий шартнома тузиш ўзининг амалий натижасини беради.



МОЛИЯВИЙ САВОДХОНЛИК ЕТАРЛИ ЭМАС

Лазизжон ДАМИНОВ,
Термиз шаҳридаги "Инсон" ижтимоий Ҳимоя маркази ходими:

— Бизда молиявий саводхонлик етарли эмас. Бу борада Марказий банк, Савдо-саноат палатаси ва бошқа бир қанча давлат ва нодавлат ташкилотларининг лойиҳалари бор, лекин уларнинг қамрови чекланган. Тажриба шунини кўрсатмоқдаки, аҳолининг молиявий саводхонлигини ошириш ишларини ташкил этишда ёш ва худудлар нуқтаи назаридан ҳам ёндашиш керак.

Сайловолди дастурига банк хизматларидан, оилавий тадбиркорлик дастурлари асосидаги кредитлар ва турли субсидиялардан фойдаланиш борасида аҳолининг билимини, хабардорлик даражасини оширишга қаратилган молиявий саводхонлик курслари фаолиятини давлат томонидан қўлаб-қувватлаш масаласини киритиш таклифини билдираимиз.

БОЛАЛАР МАЙДОНЧАЛАРИ ҲИМОЯЛАНИШИ МУҲИМ

Дилдора САЪДУЛЛАЕВА,
"O'zbekiston 24" телерадиоканали ахборот муҳарририяти муҳаррири:

— Пойтахтимиз бугун катта қурилишлар майдонига айланган, бунёдкорлик ишлари авжида. Аммо муаммолар ҳам йиғилиб қолмоқда. Масалан, шаҳарнинг урбанизация жараёни тўғри йўлга қўйилмаган, бош режаси ҳануз тасдиқланмаган. Уй-жой коммунал соҳасида муаммолар вазиятлар тўлиқ бартарар этилмаяпти, ёгингарчилик бўлди дегунча, дренаж-оқова суви тизимидаги камчиликлар ярқ этиб чиқади. Болалар майдончалари қаровсиз ва эгасиз бўлиб қолмоқда.

Сайловолди дастурида кўп қаватли уйларга туташ бўлган жойларда замонавий болалар майдончаларини қуриш, реконструкция қилиш ва сақлаш учун аниқ жавобгар ташкилотни белгилаш масаласини илгари сўриш лозим. Ушбу майдончаларни захира ер мақомидан чиқариб, қурилишдан холи, ўзлаштириб олишдан Ҳимояланган, алоҳида кадастрга эга бўлган худудга айлантириш керак, деб ўйлаймиз. Шунингдек, жойларда "Жамоат



боғи" ёки "Саломатлик боғи"ни ташкил этиш зарур. Бу боғлар кексалар учун югуриш ва велойўлакларни, замонавий спорт ва ўйин қурилмаларини, турли хил машғулотлар билан шўғулланиш учун махсус зоналарни ўз ичига олса, нур устига нур.

ҲУЖЖАТЛАР КўПЛИГИ ИЖРОНИ ҚИЙИНЛАШТИРАДИ

Шохруҳ ЎКТАМОВ,
Қонунчилик палатаси ҳузуридаги Ёшлар парламенти аъзоси:

— Ёшлар сиёсатида оид бир қатор ҳуқуқий-норматив ҳужжатлар ишлаб чиқилган ва амалиётга татбиқ этилган. Аммо уларнинг кўплиги, ижросини таъминлашга қаратилган қонуности ҳужжатлари ва ички идоравий ҳужжатларнинг хилма-хиллиги соҳада ишларнинг амалий жараёндан қочиб, статистика юритиш, ҳисобдорликни ошириш каби йўналишларга урғу қаратишга олиб келади. Шунинг учун ҳуқуқий ҳужжатларни умумлаштириш зарурати юзага келмоқда.

Тахлилларга кўра, ёшларга оид масалалар бўйича 130 га яқин меъёрий ҳужжатлар бор. Сайловолди дастурида "Ёшлар кодекси"ни ишлаб чиқиш таклифини илгари сўриш керак, деб ўйлаймиз. Бунда ёшларни қийнаётган муаммолар бўйича давлат жавобгарлигини ошириш, қонунчилик орасида интеграцияни таъминлаш, ногиронлиги бўлган ёшларнинг имтиёзлари ва улар олдида ҳукуматнинг масъулиятини аниқ белгилаш масалалари ҳам қамраб олинмоғи мумкин.




Форумда ёшлар томонидан мана шундай залворли ва жўяли таклифлар билдирилди. Улар ўз ғояларини хорижий тажрибага таяниб изоҳлашди, электорат манфаати нуқтаи назаридан асослашди. Самарқанд вилояти вакилларининг ҳаракатланишида махсус аравачалардан фойдаланувчиларни туризмга жалб қилиш борасидаги таклифи, айниқса, кўпчиликка маъқул бўлди.

Умуман, форумда қизиқ, асосли, оптимистик ғоя ва таклифлар берилди. Турли худудлардан битта платформага йиғилган ёшлар ўзаро фикр алмашиш, долзарб саволларга биргаликда жавоб олиш муҳити юзага келди.

Энг муҳими, ёшларда фаоллик бор, ислохотларга дахлдорлик бор. Ана шундай ёш аъзоларимиз сафи кенгайверсин!

Зилола УБАЙДУЛЛАЕВА,
"Ўзбекистон овози" муҳбири.



БОЛАЛАРДА КЎЗ САРАТОНИ: АЛОМАТЛАР ВА САБАБЛАР

ЯҚИНДА ИЖТИМОЙ ТАРМОҚЛАРДА ЎЗБЕКИСТОНДА БОЛАЛАР ЎРТАСИДА КЎЗ САРАТОНИ БИЛАН КАСАЛЛАНИШ ҲОЛАТИ КЕСКИН КЎПАЙГАНИГА ДОИР ХАБАРЛАР ТАРҚАЛДИ. БОЛАЛАРНИНГ ҚЎЛ ТЕЛЕФОНЛАРИ БИЛАН КЎП ВАҚТ ЎТКАЗАЁТГАНИ БУНГА АСОСИЙ САБАБ ҚИЛИБ КЕЛТИРИЛДИ. АЙТИЛИШИЧА, ЗАМОНАВИЙ ГАДЖЕТЛАР КЎЗ НУРИГА АСОРАТЛИ ТАЪСИР КЎРСАТИБ, ОХИР-ОҚИБАТ КЎЗ САРАТОНИДЕК ОҒИР ХАСТАЛИККА ОЛИБ КЕЛИШ ЭҲТИМОЛИ МАВЖУД.

ХУШ, ВАЗИЯТ ҲАҚИҚАТАН ҲАМ ШУНДАЙМИ? УМУМАН, БОЛАЛАРДА УЧРАЙДИГАН КЎЗ КАСАЛЛИКЛАРИГА САБАБЛАР НИМА? АЛОМАТЛАРИ ВА АСОРАТЛАРИ ҚАНАҚА?

РЕСПУБЛИКА ИХТИСОСЛАШТИРИЛГАН ОНКОЛОГИЯ ВА РАДИОЛОГИЯ ИЛМИЙ-АМАЛИЙ ТИББИЁТ МАРКАЗИ ОНКОФТАЛЬМОЛОГИЯ ШИФОКОРИ РУСТАМ УСМОНОВ БИЛАН ШУ ҲАҚИДА СУҲБАТЛАШДИК.



- Болаларда турли кўз касалликларининг олдини олиш учун биринчи галда нима талаб этилади?

Инсоннинг кўриш органи, яъни кўз танадаги энг мураккаб сезги аъзолардан биридир. У кўз олмаси, кўриш нервлари ва ёрдамчи органлар (*қобок, қош, киприк, кўз олмаси мушаклари*)дан ташкил топган. Кўз олмаси мушакларини миядан келувчи сигналлар бошқаради. Кўзнинг тузилиши мия тузилишини эслатиши бежиз эмас. Шунинг учун кўзни миянинг бир қисми, десак адашмаймиз. Инсон ташқи олам ҳақидаги ахборотнинг 75 фоизини кўз орқали олади. Боланинг ҳар томонлама тўлиқ ва соғлом ривожланишида кўзнинг роли жуда каттадир.

Янги туғилган чақалоқларнинг кўриш ўткирлиги жуда ҳам паст бўлади, лекин бир ёшгача бу қобилият тез ривожланиб боради. 4-5 ёшда кўриш ўткирлиги юз фоизгача кўтарилади. Лекин ҳамма болаларда ҳам бундай бўлавермайди. Биламизки, баъзи болаларда маълум бир кўз касалликлари туғма бўлади, баъзи болаларда эса улар турли сабабларга кўра кейинроқ пайдо бўлиши, яъни орттирилиши мумкин.

Айрим кўз касалликлари борки, бунда инсоннинг кўриш қобилияти қисман пасаяди, бироқ кўз ожизлигига олиб келадиган хасталиклар ҳам оз эмас. Кўз саратоми шулар жумласидандир. Афсуски, болалар ўртасида ушбу турдаги хасталик учраб туради.

Кўз касалликларининг олдини олиш ёки эрта аниқлаш учун болани йўриқнома бўйича ҳар олти ойда офтальмолог текширувига олиб бориш керак. Биринчи текширувни туғуруқхонада педиатр ўтказеди. Қўл фонарчасининг нури чақалоқ кўзига туширилса, қорачик тораяди ёки хонанинг чироғи ёқилса, бола сесканиб кетиши, юзини бошқа томонга буриши – буларнинг бари кўриш қобилияти борлигидан далолат беради.

Гўдак бир ойлик бўлганда предметни кузатиш, баъзида нигоҳни қадаш рефлекс ривожланади ва айнан шу паллада уни болалар офтальмолог кўриш қобилияти текширувига олиб бориш керак. Биринчи текширувни туғуруқхонада педиатр ўтказеди. Қўл фонарчасининг нури чақалоқ кўзига туширилса, қорачик тораяди ёки хонанинг чироғи ёқилса, бола сесканиб кетиши, юзини бошқа томонга буриши – буларнинг бари кўриш қобилияти борлигидан далолат беради.

Авалло, ҳар бир ота-она фарзанди соғлигига диққат-эътиборли бўлиши, хусусан, кўзидаги ўзгаришларга доимо разм солиб, турли касалликларнинг олдини олишда масъулият ҳис қилмоғи керак. Бундай масъулият бола билан контактда бўладиган бошқа шахслар (энага, боғча опа, педиатр)дан ҳам талаб этилади.

- Болалар ўртасида асосан қайси турдаги кўз касалликлари учрайди?

Болаларда учрайдиган айрим кўз касалликлари ва уларнинг белгиларига қисқача тўхталадиган бўлсак, улар бир неча турларни ўз ичига олади.

Кўз қоқоқлари ва терисида қизил нуктача ёки доғ ҳосил бўлиб, тез катталашиши мумкин. Бу қон томирдан чиққан ўсма гемангиомадир. Халқимизда бунга “нор” деб аташди ва бола исмига “нор” кўшиб айтилса, касаллик қайтиб кетади, деган нотўғри тушунича ҳам бор. Ваҳоланки, кўз гемангиомасини ўз вақтида даволамаса, катталашиб юзнинг ярмини эгаллаши мумкин. Ёки бўлмаса бурун ва оғиз бўшлиқлари ва милкларига қадар ўсиб, нафас олишни қийинлаштириб қўяди.

Қоқоқларнинг четида ва бурчагида, кйрикларда ёпишқоқ, шилимшиқ ажратма – ирринг пайдо бўлса, бу кўз милки (*конъюнктив*)нинг ёки ёш қопчасининг шамоллаши ҳисобланади.

Кўзнинг оқсил пардаси чақалоқларда оч ҳаво рангда бўлади ва секин-аста оқ рангга қиради. Агар бола туғилганда оқсил парда тўқ ҳаво ранг бўлса, қорачик кенгайган бўлиб, чироқ ёнганида тораймаса ёки кўз олмасининг ҳажми каттароқ туюлса, дарҳол офтальмологга мурожаат қилиш керак. Бу белгилар туғма глаукомага хосдир.

Қорачик ҳажми одатда 2-3 мм ва у қора рангда бўлади. Агар қорачик туғилганда оқсил рангда бўлса, бу туғма катарактадан дарак беради.

Чақалоқларда ва кичик ёшдаги болаларда кўп учрайдиган яна бир касаллик – бу ғилайлик. Ғилайликнинг сабабини аниқлаб, кўзойнак тақиш керак ёки операция қилдириш лозим. Ғилайликнинг яна бир сабаби кўз ичидagi онкологик хасталик бўлиши мумкин.

Юқорида айтилган касалликлар ўз вақтида аниқланиб, даволанмаса, боланинг кўриш ўткирлиги пасайишига ёки батамом йўқолишига олиб келади. Оқибатда бола ногиронликка дучор бўлади.

- Кўз саратоми белгилари ҳақида айтиб ўтсангиз? Ушбу касалликнинг кўпайишига чиндан ҳам уяли телефонлар сабабми ёки бошқа омиллар ҳам борми?

Афсуски, янги туғилган чақалоқ ва кичик ёшдаги болалар ўртасида ҳам кўз саратоми касалликлари учраб туради.

Кўпчилик бундай касалликлар тўғрисида ҳеч қандай маълумотга эга эмас. Баъзан ота-оналар билан мулоқотда бўлганимизда “Кичкина бола кўзида ҳам ўсма бўларканми?” дея ишонқирай сўрашади. Кўз ичидa учрайдиган ёмон сифатли ўсма түр пардада ўсади. Бу ретинобластома деб аталади.

Биринчи бор бу касаллик XVII асрда қайд этилган: уч ёшли боланинг қорачиғи ғайриоддий ёниб (мушукнинг кўзига ўхшаб) турганини пайкаган онаси шифокорга мурожаат қилгани илмий адабиётларда келтирилади.

Дарҳақиқат, қорачикнинг оқариб ялтираши ёки бўлмаса мушук кўзига ўхшаб ёниши ва ғилайлик бу касалликнинг асосий белгиларидир. Айни аломатлар касалликнинг энг эрта намоён бўладиган симптомлари саналади. Агар болада бундай белгилар пайдо бўлса, зудлик билан онкоофтальмологга мурожаат қилиб, мукамал текширувлардан ўтиш керак. Ўсма кўзни ичидa катталашгани сари унинг белгилари ўзгаради ва у бошқа касалликларга ўхшаб кечади. Бу эса ота-онани чалғитиши, болани онкоофтальмологга эмас, бошқа мутахассисга кўрсатиб, зарар келтирувчи муолажалар қилинишига сабаб бўлиши мумкин.

Баъзи ҳолларда эса ота-оналарнинг бепарволиги туфайли ўсманинг 3-4 стадиясига борганда, бола бутунлай кучдан қолгач, бизга олиб келишади. Амалиётда шундай ҳолатга ҳам дуч келдикки, келинчак болада касалликнинг белгиларини сезиб, шифокорга мурожаат қилмоқчи бўлганда оила катталари – қайнона-қайнога ружсат бермаган. Оқибатда касаллик ривожланиб кетган. Очиғи, бу болага нисбатан ваҳшийликдан бошқа нарса эмас. Ачинарлиси шуки, бундай ҳолларда замонавий тиббиёт ҳам ёрдам беришга ожизлик қилади.

Ушбу хасталик бутун дунёда қайд этилган бўлиб, бошқа хил ўсмаларга нисбатан кам тарқалган. Болалар кўз касалликлари орасида ретинобластома 0,07 фоизни ташкил этади. Ўсманинг бошланғич босқичини аниқлаш жуда қийин. Чунки у чақалоқларнинг кўзида бола ҳаёти хавф остида қолади. Афсуски, жуда кичик ёшдаги болалар кўриш даражасининг пасайгани ёки кўзи оғриётгани ҳақида шикоят қила олмайдилар. Шунинг учун чақалоқларни ва кичик ёшдаги болаларни ўз вақтида офтальмолог кўригидан ўтказиб туриш ота-онанинг бурчидир.

Энди кейинги саволингизга тўхталадиган бўлсак, албатта, кўз саратоми келиб чиқишида айнан уяли телефонларни ағона сабаб

қилиб кўрсатиш унчалик ҳам ўринли эмас. Бу касалликка бир неча омиллар сабаб бўлиши мумкин.

Германиялик олимлар ўз тадқиқотларига таяниб, уяли телефонлардан кўп фойдаланувчиларда бошқаларга нисбатан кўз саратоми кўрсаткичи кўпроқ кузатилишини илгарчи сурмоқдалар. Лекин бошқа бир олимлар гуруҳи бу тадқиқотга шубҳа билан қарайдилар. Уларнинг фикрича, тадқиқотга оид тўлиқ ва аниқ маълумотлар берилмагани важдан батафсил ўрганмай бундай хулосага келиш нотўғридир. Лекин нима бўлганда ҳам, уяли телефонлардан фойдаланишда меъёрнинг бўлгани афзал. Айниқса, болаларнинг гаджетларга тобе бўлиб қолиши нафақат саломатлик, балки психологик ва руҳий-маънавий томонлама ҳам зиён экани аниқ.

- Қўл телефонлари, гаджетлар, ис-тайимизми-йўқми, кундалиқ ҳаётимиздаги асосий воситалардан бўлиб қолди. Болалар бу воситалардан неча ёшдан бошлаб фойдаланиши жоиз?

Жаҳон соғлиқни сақлаш ташкилоти тавсияларига кўра, бола қўлига 2 ёшгача гаджетларни тутқазиб керак эмас. 5 ёшгача бўлган болаларга кун давомида максимум 1 соат давомида фойдаланишга рухсат бериш тавсия этилган.

Болаларда телефондан фойдаланишда оптимал ёш 7 ёш, деб белгиланади. Шунда ҳам бола мактабга боришни бошлаган ҳамда ота-онасидан узоқда бўлган вақтда шошилинч ҳолатларда хабардор бўлиб туриш мақсадида фойдаланиш аниқ муддао.

Шу ўринда яна бир маълумотни айтиб ўтмоқчиман. Ўтган асрларда юқорида келтирилган ҳамда турли ирсий касалликларга келиб чиқишига сабаб бўлиши мумкин. Ҳозирги кунда ирсий ва ўсма касалликларга мойиллик бор ёки йўқлигини билиш учун генетик тестлар ўтказилмоқда. Агар турмуш қураётган ёшларимиз тиббий кўриқдан ўтиб, генетик тестлар орқали ўз саломатликлари ҳақида аниқ маълумотга эга бўлсалар, бу келгусида соғлом насл давомийлигини таъминлаш, гўдакларнинг турли ирсий касалликлар билан дунёга келиш ҳолатлари барҳам топиши шубҳасиз.

“Ўзбекистон овози” мухбири Бардамбек САЪДУЛЛАЕВ суҳбатлашди.



+27 Корақалпоғистон Республикаси
+19 Хоразм

+26 Бухоро
+15 Навоий

+28 Тошкент Самарқанд
+14 Жиззах Сирдарё

+25 Қашқадарё
+15 Сурхондарё

+22 Андижон Наманган
+13 Фарғона

+25 Тошкент
+23 шаҳри

ИШОНЧИМ КОМИЛКИ, СИЗЛАР БУ ЮТУҚДАН ЯНАДА РУҲЛАНИБ, ФИНАЛ БЕЛЛАШУВИДА "ОСИЁ ЧЕМПИОНИ" ДЕГАН ШАРАФЛИ НОМ УЧУН МУНОСИБ КУРАШ ОЛИБ БОРАСИЗ.

Шавкат МИРЗИЁЕВ.



ТАРИХДА ИЛК БОР:

ОЛИМПИАДА ЧИПТАСИ ҚУЛИМИЗДА

2024 йилнинг 29 апрели ўзбек футболчи учун тарихий кун бўлиб қоладиган бўлди. САБАБИ, КУНИ КЕЧА ТЕМУР КАПАДЗЕ БОШЧИЛИГИДАГИ ЎЗБЕКИСТОН ОЛИМПИА ТЕРМА ЖАМОАСИ ШУ ЙИЛНИНГ ЁЗ ФАСЛИДА ФРАНЦИЯ ПОЙТАХТИ ПАРИЖ ШАҲРИДА БЎЛИБ ЎТАДИГАН ОЛИМПИА УЙИНЛАРИ ЙЎЛЛАМАСИ СОҲИБИГА АЙЛАНДИ. ШУНИНГДЕК, ЁШЛАР ЖАМОАМИЗ МУСОБАҚАДА ЧЕМПИОНЛИК УЧУН КУРАШНИ ДАВОМ ЭТТИРАДИГАН БЎЛДИ.

ЯРИМ ФИНАЛГАЧА БОСИБ ЎТИЛГАН ЙЎЛ

Ўзбекистон Олимпия жамоаси Осиё кубоги U-23 турнири гуруҳ босқичини Малайзия устидан ғалаба билан бошлаган бўлса, кейинги икки турда Қувейт ва Вьетнам устидан йирик ҳисобдаги ғалабалар қўлга киритилди. Шу тариқа Темур Кападзе шогирдлари гуруҳ босқичини юз фоизлик натижа билан яқунлаб, муддатидан аввал плей-офф йўлланмасини ҳал қилди. Чорак финалда эса Ўзбекистон 2022 йилги Осиё кубоги U-23 финалида Саудия Арабистонидан учралган аламли мағлубият учун реванш олди ва ярим финалга қадам етиб келди. Турли баҳс-мунозаралар ва тўқнашувлар остида кечган беллашувда Олимпия жамоамиз ўзининг кучли томонларини кўрсата олди. Бу эса рақибларнинг имкониятини сезиларли даражада пасайтирди. Улар асабийлашиб, турли хатолар қилишни бошлади, бу эса Олимпия жамоамизга қўл келди.

АВВАЛГИ УРИНИШЛАР

Ўзбекистон футбол бўйича ўз тарихида ҳали олимпиадага чиқа олмаган эди. Олимпиячиларимиз 2012 йилда Вадим Абрамов бошқарувида Лондон олимпиадасига йўлланма олишга жуда яқин келган, аммо БАА билан ўйиннинг биринчи бўлимида 2:0 ҳисобида ғалаба қозонаётган вакилларимиз иккинчи бўлимда 3 та тўп ўтказиб юбориб, олимпиада йўлланмасини қўлдан бой берган. Шундан сўнг, Осиё кубоги U-23 турнирининг охириги ўчтасида Ўзбекистон икки марта финалга чиқишга муваффақ бўлган. Бу орада 2018 йил Равшан Ҳайдаров мураббийлиги остида чемпионлики қўлга киритган, 2022 йил эса Темур Кападзе бошчилигидаги финал беллашу-

вида Саудия Арабистонига мағлуб бўлиб, иккинчи ўрин соҳибига айланган бўлишига қарамай, ўз тарихида ҳали Олимпия ўйинлари йўлланмасига эга чиқмаган эди. Сабаби, жамоамиз олимпиада йўлланмасини тақдим этмайдиган вақтда мусобақада муваффақиятли иштирок этган, Токио-2020 йўлланмасини берадиган турнирда эса Олимпия жамоамиз Любинко Друлович мураббийлигида 3-ўрин учун баҳсда Австралияга 1:0 ҳисобида ютқазиб қўйганди.

МУСОБАҚАДАГИ ЭНГ ҚИММАТ ТАРКИБ

Жамоамизнинг турнирда энг қиммат таркибга эга экани барча ўзбек мухлислари учун яна бир қувонарли ҳолат ҳисобланади. Бу эса футболимиз янги босқичга кўтарилганини англатади. Биргина Аббосбек Файзуллаевнинг бутун бошли Индонезия таркибидан қимматроқ экани, ярим финал баҳсида яққол фаворит эканлигимизни англатарди. Қайд этилишича, Ўзбекистон Олимпия жамоаси бу йилги Осиё кубогида таркибдаги футболчиларнинг умумий нархи 17,35 миллион евро ташкил этади. Жамоамизга қарши майдонга тушган Индонезия ёшлари эса 4,80 миллион евро нарх билан турнирда бу борада 6-ўринда қайд этилган эди. Эътиборлиси, Трансфермаркт порталига кўра, биргина Аббосбек Файзуллаевнинг трансфер баҳоси (5 млн евро) Индонезиянинг бутун бошли таркибидан (4,8 млн евро) қимматроқ саналарди.

Япония ёшлар терма жамоасига қарши финал баҳсида ҳам Темур Кападзе шогирдларига амал тилаб қоламиз. Эслатиб ўтамиз, мазкур беллашув 3 май кuni бўлиб ўтди.

Жамшид АМИРОВ.

ИШТИЁҚИ БАЛАНД ЁШЛАР – САЛОҲИЯТЛИ КУЧ



Зокир ИСМАИЛОВ,
УрДУ ҳузуридаги Хива қишлоқ
ҳўжалик техникуми директори:

– Мамлакатимизда ижтимоий-демографик хусусиятга кўра ҳал қилувчи куч ҳисобланган қатлам – ёшларимизнинг меҳнат бозорида муносиб ўрин топиши, билим ва салоҳиятини ривожлантирган ҳолда замонавий кадрлар бўлиб етишиши йўлида қилинаётган тизимли ишлар чекка-чекка ҳудудларда ҳам ўзининг амалий натижасини бермоқда. Бунинг жумладан, Урганч давлат университети ҳузуридаги (УрДУ) Хива қишлоқ ҳўжалик техникуми фаолияти мисолида ҳам яққол кўриш мумкин.

Президентимизнинг 2019 йил 6 сентябрдаги "Профессional таълим тизимини янада такомиллаштиришга доир қўшимча чора-тадбирлар тўғрисида"ги Фармонида мувофиқ 2020 йилда Хива қишлоқ ҳўжалик касб-хўна коллежи УрДУ ҳузуридаги Хива қишлоқ ҳўжалик техникумига айлантирилди. Бу эса муассасамиз ҳаётида тамомила янги саҳифа очди, десак муболаға бўлмайдими.

Қишлоқ ҳўжалигининг ўнга яқин йўналишида профессионал таълим берилаётган техникуми 2021-2022 ўқув йилида 142 нафар, ўтган йили эса 97 нафар йигит-қиз тамомлади. Бугунги кунда уларнинг салмоқли қисми ўз мутахассисликлари бўйича олий таълимда таҳсилни давом эттираётган бўлсалар, яна бир қисми эгаллаган касблари бўйича корхона, ташкилотларда ишламоқда.

Техникумда ҳудуд меҳнат бозори талабларидан келиб чиққан ҳолда ўқитиш ишлари такомиллаштириб борилаётгани битирувчиларимиз орасида ишсизлик ҳолатларининг олдини олишда муҳим омил бўляпти. Қолаверса, маҳаллий ишлаб чиқарувчилар билан шартнома асосида мутахассисларни тайёрлашда сиртки таълим шакли йўлга қўйилгани диққатга моликдир. Ҳозирда сиртки таълимда еттита йўналиш бўйича 229 нафар йигит-қиз таҳсил олмақда. Ўқув даргоҳимизда малакали педагогик жамоа шаклланигани ҳам айтиб ўтиш ўринли.

Умуман олганда, ўқувчи-ёшларимизнинг танлаган мутахассисликларини мукамал эгаллаши, назария ва амалиётни уйғунликда олиб бориши учун техникумда барча шарт-шароит яратилган. Давр талаблари асосида жиҳозланган фан хоналари, лабораториялар ҳамда амалиёт устахоналари, кутубхона, спорт зали ва тўғарақлар уларнинг ихтиёрида.

Айтгандай, ўқувчиларимиз шаҳар, вилоят миқёсида ўтадиган маънавий-маърифий тадбирларда ҳам фаол ва илғор. Яқинда техникумимиз жамоаси "Заковат" интеллектуал ўйини шаҳар босқичида иштирок этиб, фахрли 1-ўринни қўлга киритди. Йигит-қизларимиздаги иштиёқ, интилиш ва ғайратни кўриб, бундай ютуқлар бардавомлигига ишончимиз ортади.

ТОШКЕНТДАГИ ЖАҲОН КУБОГИДА 7 ТА МЕДАЛЬ

26 – 28 апрель кунлари пойтахтимизда бадий гимнастика бўйича жаҳон кубогининг тўртинчи босқичи бўлиб ўтди. Унда Ўзбекистон терма жамоаси 2 та олтин, 4 та кумуш ва 1 та бронза, жами 7 та медални қўлга киритди.

Мазкур мусобақада дунёнинг 34 мамлакатидан 100 дан ортиқ гимнастикачи қизлар иштирок этди.

Мусобақаларда юртимиз шарафини ҳимоя қилган Тахмина Икромова яққалик баҳсларининг ҳалқа ва тўпда машқ бажариш беллашувида олтин, булава ҳамда тасмада машқ бажаришда кумуш медалга сазовор бўлди.



МУАССИС:



ЎЗБЕКИСТОН
ХАЛҚ ДЕМОКРАТИК
ПАРТИЯСИ
МАРКАЗИЙ КЕНГАШИ

O'zbekiston ovozi

ТАХРИР НАУ'АТИ:

Ulug'bek INOVATOV
Ulug'bek VAFOYEV
Maqsuda VORISOVA
Qalandar ABDURAHMONOV
Guliston ANNAQILICHEVA

Muslihidin MUHIDDINOV
Hayotxon ORTIQBOYEVA
Shuhrat ISLOMOV
Toshtemir XUDOYQULOV

Бoш муҳаррир: То'лиқ ТО'РАХОНОВ

МАНЗИЛИМИЗ: 100029, Тошкент, Мустақиллик майдони 5/3

Телефонлар: (71) 239-12-14

Реклама бўлими: (91) 190-19-49. E-mail: uzbovozi@mail.ru

«Sharq» nashriyot-matbaa aksiyadorlik kompaniyasi bosmaxonasida chop etildi.
Korxonа manzili: Buyuk Turok ko'chasi, 41-uy.
Gazeta ofset usulida, A-2 formatida bosildi. Hajmi — 4 bosma taboq.

Gazeta O'zbekiston Matbuot va axborot agentligida 0006-raqam bilan 2007-yil 11-yanvarda ro'yxatga olingan.

Navbatchi: Ravshan SHODIYEV
Sahifalovchi: Bekzod ABDUNAZAROV

Г — 537. 3497 nusxada bosildi.

Nashr ko'rsatkichi — 220.

t — Tijorat materiallari

O'ZA yakuni —

Topshirilgan vaqti — 23:20

1 2 3 4 5 6

Sotuvda kelishilgan narxda

Gazeta haftaning chorshanba kuni chiqadi. «O'zbekiston ovozi» materiallarini ko'chirib bosish faqat tahririyat ruxsati bilan amalga oshiriladi.